

Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatsereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamut sulisuminnillu amerlisaanissamut aaqqissuussaannikkut aammalu inatsisitigut kigaallisaatit, uniffiit suunerannik kingusinnerpaamik UKA2019-imi Naalackersuisut saqqummiussinissaat pillugu Inatsisartunut aalajangiiffigisassatut siunnersuut. Kigaallisaatit, uniffittut suussusersineqartut qanoq ililluni peerneqarnissaannut sapinngisamilluunniit kigaallisaatit, uniffiit annikinnerpaamiitinnissaannut siunnersuummik nassuiaat imaqassaaq.

(Inatsisartunut ilaasortaq Aqqaluaq B. Egede, Inuit Ataqatigiit)

Akissuteqaat

(Aatsitassanut Suliffeqarnermullu Naalackersuisoq)

Siullermeerneqarnera

Naalackersuisut sinnerlugit siunnersuummut Inatsisartunut ilaasortap Aqqaluaq B. Egedep, Inuit Ataqatigiit, saqqummiussaanut qujavugut.

Suliassaqarfimmi unammilligassat suunersut Naalackersuisut ilisimaarilluareerpaat. Unammilligassat taakkua pakkersimaarniarlugit suliniutinik arlalinnik atuutsitsisoqalerpoq.

Assersuutigalugu pisinnaatitsissuteqartoq pisuussutinik imminut akilersinnaasumik piiarneqarsinnaasunik paasinarsitsisimappat, annikitsumik aatsitassarsiornissamut pisinnaatitsissummik pigisaqartup annikitsumik aatsitassarsiornissamut akuersissut pigisani akiliuteqarfiumngitsumik ukiut qulit angullugit sivitsortissinnaaneranut periarfissaqarpoq. Periarfissaq taanna pisinnaatitsissummik pigisaqartut arlallit atortareerpaat.

Assersuutitut allatut taaneqarsinnaavoq, maannakkut avammut nioqquteqarnissamut akuersissummik, avammut nioqquteqarnernut arlalinnut tunngassuteqartumik, tunniussisoqarsinnaammat. Tamanna annikitsumik aatsitassarsiornissamut pisinnaatitsissummik pigisaqartunit kissaatigineqarsimavoq, tassami tamanna pisinnaatitsissummik pigisaqartup tunisinissaanut pitsaanerusunik periarfissaqalersitsisarmat. Annikitsumik aatsitassarsiornissamut pisinnaatitsissummik pigisaqartut ataasiakkaat tamarmik immikkut kisermaassisussaataalluni akuersissutinik tallimat angullugit, katillugit 5 km²-inik annertussuseqartunik, peqarsinnaapput. Taamaalilluni akuersissutinik tallimanik, imminnut attuumasunik, peqarnissaq periarfissaavoq. Taamaaliornermi sumiiffik 5 km²-isut annertussuseqartoq piviusumik peqarfigineqarsinnaavoq. Sumiiffiit akuersissuteqarfiusut ataasiakkaat iluanni inuit qulit najuussinnaapput, tassalu tallimanik akuersissutinik peqarnermi inuit 50-iusinnaallutik. Aammattaaq sulisorisat amerlassusissaat, inunnut sumiiffimmi akuersissuteqarfiusumiittunut killeqartinneqanngilaq. Sumiiffiup

akuersissuteqarfiusup avataani, assersuutigalugu silisisartunik imaluunniit tuniniaasartunik, illoqarfimmi imaluunniit nunaqarfinni illoqartunik, allanik sulisoqarnissaq killeqartinneqanngilaq.

Taamaalilluni inatsisit atuutereersut iluanni annikitsumik aatsitassarsiorluni suliaqarnerup ineriartortinneqarnissaanut periarfissarpassuupput. Periarfissat taakkua ilisimaneqarnerulersinneqarnissaat aallunneqarsinnaavoq, tamannalu maannakkorpiaq siunnerfilimmik sulissutigineqarpoq.

Annikitsumik aatsitassarsiornissamut pisinnaatitsissummik pigisaqartut ujaraatitik pinneraasiassat Aatsitassanut Suliffeqarnermullu Naalakkersuisoqarfimmi pisussaaffiliinngitsumik missiliuisitsillutik nalilersuisitsinnaapput. Pisinnaatitsissummik pigisaqartorpasuit periarfissat atuuttut pillugit siunnersorneqarnissamut ilitersorneqarnissamullu periarfissanik atorluaasarput. Ujarassiornermut aamma ujaqqanut pinneraasiassanut suliassaqarfimmi, kisianni aamma inatsisinuunnaq tunngasuni.

Annikitsumik aatsitassarsiornissamut pisinnaatitsissummik pigisaqartunut assigiinngitsunik pikkorissaasoqartarpoq, assersuutigalugu silisinermit pikkorissaaneq, aatsitassarsiornissamut pilersaarusiorneq, assiliinermit pikkorissaaneq aammalu ujaqqanik pinneraasiassanik akilersuisarneq. Tamatuma saniatigut annikitsumik aatsitassarsiornermik ingerlatsinermit tunngatitanik assigiinngitsunik oqalugiartitsisoqartarpoq. Suliniutit taakkua kissaatigineqartunut siunnersuutigineqartunullu annikitsumik aatsitassarsiornissamut pisinnaatitsissummik pigisaqartut namminneerlutik saqqummiussimasaannut, naapertuuttumik pilersinneqartarput.

Tamakkuninnga suliniuteqartoqaraluartorluunnit, Naalakkersuisut annikitsumik aatsitassarsiornermit tunngasut siuarsarniartuarpaat. Annikitsumik aatsitassarsiornissamut akuersissutaatilinnut, december-imi Nuummi seminar-eqartitsinissaq Naalakkersuisut sulissutigaat. Tassani annikitsumik aatsitassarsiornermi inatsit paasissutissiissutigineqarnissaa periarfissaassooq. Annikitsumik aatsitassarsiornissamut akuersissutaatillit, oqartussat, avataaneersullu soqutiginaatillit oqalugiassapput, oqallittoqartassallunilu. Tassani annikitsumik aatsitassarsiorsinnaanermik akuersissutaatillit misilittakkatik saqqummiussinnaavaat, annikitsumillu aatsitassarsiornermit atatillugu pitsanngorsaataasinnaasunik siunnersuuteqarsinnaallutik.

Suliassaqarfimmi unammilligassat suunersut Naalakkersuisut ilisimaarilluareeraluaraat, Naalakkersuisut isumaqarput annertunerusumik misissuinissamut tunngavissaqartoq. Tamanna tunngavigalugu Naalakkersuisut isumaqarput nassuiaasiornissaq siunnersuutitsialaasoq.

Naalakkersuisut matumuuna siunnersuut akuerineqassasoq inassutigaat.